

Zeitschrift: L'ami du patois : trimestriel romand
Band: 28 (2000)
Heft: 112

Artikel: [Divers]
Autor: Guex, Pierre
DOI: <https://doi.org/10.5169/seals-244283>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 05.08.2025

ETH-Bibliothek Zürich, E-Periodica, <https://www.e-periodica.ch>

L'OTTO - la cousena ?

Pas fulta dè no tsancrounî. Mè peinso que clliâo doû mot pouant trovâ onna pllièce dein noutron patois. Por quant à mè, mè seimble que l'ottô l'ètai por noutrè z'anchan la chotta yô sè cheintant bin, serrâ lè z'on contro lè z'autro avoué on fû et onna bouna sepa. Clliâo que l'îrant poûro et qu'avant fam pouâvant onco lâo cougnî po lâo retsaudâ, à l'avri de l'oûra. L'ottô l'è dèvant tot lo foyî. Lè dzein que n'avant pas on ottô po lâo reduire îrant bin d'à pillieindre !

Po quant à la cousena, que mè plliè pas atant que l'ottô, vouârdo clli mot po l'ottô dâi dzor de vouâi yô on lâi vâi min dé fû, que bourle ein faseint brelyî lè cassettè, qu'èpélûve âo bin bourme, mâ yô sè vâi onna reindjâ d'ése èlètrique prestè à tot fére cein qu'on fasâi à man lè z'autro yâdzo, dan :"la cuisine moderne".

Marie-Louise Goumaz

Dein lo derrâi "L'ami du patois", Djan dâi nâi s'èbâye se faut dere "la koujena" âo bin "l'ottô", cein que vâo à dere, po no dâo Dzorat la cousena et l'ottô. Adan, li, sè mouse que faut adî dere "ottô" et djamè "cousena" po cein que sa "cousena" l'è la felye à son oncllio âobin à sa tanta. Mâ porquie ? Lo mîmo mot pâo bin dere dûvè tsouze, quemet lo dzo (lo dzo de vouâi) et lo dzo yô lè dzenelye vant s'aguelyî.

L'è possiblyo que dein lo tot vilyo tein, lâi avaî dèso lo tâi, rein qu'on cârro avoué on foyî po fére lo fû. L'è lè que lè dzein bourlâvant dâo bou po se rètsaudâ et po couâire la tsè pu totè sorte de pedance. L'îre bin "l'ottô". L'ètai bî de lâo retrovâ iquie à la chotta po dzoûre d'onna frelâie âo d'onna voilâie et po medzi cein que la mère l'avâi préparâ.

Tot cein l'a tsandzî lâi a grantein, du lo dzo yô l'ant fé onna âo duvè tsambrè. Sti dzo, l'ant de "l'ottô" por tot cein que l'îre dèso lo tâi. L'a bin falyu s'espliquâ et dere: "lo pâilo de dèvant", "lo pâilo de derrâi", et pu... "la cousena", lè yô la cousenâire couâi lè z'alimeint su lo foyî, lo fornet, lo potadzî, et pu, vouâi.... faut-te dere lo potadzî èlètrique ào bin la cousenâire èlètrique? Dite-mè vâi, Monsu Djan dâi nâi.

Et pu, n'è pas tot. Noutron Doyen Bridel, que viquessâi lâi a doû ceint z'an desâi dzà "cousena". Et crâyo que pè Roma et pè Aventicum, clliâo que de noutrè z'anchan que dévesâvant latin desant "cucina". Cucina, coussena. La "cucina" pâo pas dècriâ la "cousena". L'è bal et bin de sa famelye.

Por mè, l'ottô, l'è tota la dêmâora, et la coussena, la pllièce que la cousenâire lâi fâ la coussena.

Pierre Guex.